

PRIMER CART NI BCUAA SAN PABLI LO TIMOTEO

¹ Nare Pabli, naa tuby apóstol xte Jesucrist pur guelnabee xte Dios ni run perdón de xtuldni ne pur Jesucrist ni canuun gueed stuby. ² Cacuáa cartré par liú Timoteo, te pur par nare liú noo zecac tuby llingaana pur ni tubylote roldilaazni Jesucrist. Xtadni Dios ne Dad Jesucrist gunldeeny quiu, ilaslaazny liú, ne iguaadny liú guelnaldiuaaz.

³ Ne zec ni aguniia liú chi bdiaa par záa nez Macedonia, dec yáanu láani guidx Efeso, par cuxnezu tuby tiop de bniety ruy par quítru il-iuudeb de bniety de ni quit ná didxldí. ⁴ Ne quítru chaldilaazdeb ni rguichlaaz de bniety, nicli quit güntideb cuend capac nez zádeb, o túpac de rac to xpíngul gulaldeb, te pur de cosqui quit xo gacnétidengui laadeb par chaza chaldilaazruplicdeb xtiidx Dios.

⁵ Ni rcaaza gúndeb ná icaazdeb de saadeb par iliuu dec nabányquideb zec ni riáld nez lo Dios, ne dec anánzadeb cún ni ná güen ne cúnza ni ná mal par iliuu dibyquia dibylaazdeb reldilaazdeb xtiidx Dios. ⁶ Te pur nuudeb nicli quítru runtideb ziý tant mases iríñqui de ni quit illiú ni rueedeb. ⁷ Rcaazdeb iliuudeb de bniety xa ná ley xte Dios, ne nicli laadeb quit gández xi zelo ni rniideb, nicliza quit racbeedeb xi zelo ni cuenzi rliuudeb de bniety.

⁸ Dunní nánní dec güenqui ná leyqui par bniety ni racbee xi par illiúni. ⁹ Ne nánzacni dec quit bniidxti Dios leyqui par de ni nabány zec ni riáld nez lony, sino que leyqui ná par gac de bniety castigu, de bniety ni nabány zec ni ná xgabni, de ni quit rcuadiag diidx, de ni quit zéne cuend Dios, de ni run duld, de ni quit ráp didxdo Dios, de ni quit run pur ito Dios, de ni rguinxú xtadni o xnanni, ne par irate de ni rguinxú de bniety. ¹⁰ Ziyza rlliú leyqui par castigu xte de bniety ni nap stuby nguiu o stuby gunaa, par de ni rzebylaaz lagac saa nguiuni, o de gunaa ni rzebylaaz lagac saa gunaani, ne par de ni rbaan de bniety par itóodeb laadeb de mos. Ziyza rlliú leyqui par castigu xte de ni ruee dixú, de ni run jurar par sutipnédeb dixú xtendeb, ne par irateru de ni run contrí ni nánní ná didxldí. ¹¹ Ne de didxldíre ná ni zéed lo de diidx nasaa xte Jesucrist. Xtadni Dios ni riáld didxdo ne diidx zaac, laany ná ni bsannény nare de diidxré par itiicha.

¹² Xtiosten Xtadni Jesucrist laany ná ni cayacnén y nare, ne pur confianz ni napny naa ax bcuabeeny nare par itiicha xtiidxny, ¹³ masqui guloqui guniia de diidx mal pur laany, ne guzunaldzaca de ni reldilaaz laany ax quesentiand rnía baania tratdeb. Per Dios blaslaazny nare pur ni quit guceetia xi cayuna pur ni gady chaldilaaztia Jesucrist. ¹⁴ Ne quesentiand güen gúcny cun nare, bliuuny naa xa xquel chaldilaaza ne bniidxzacny guelrcaaz ni rdxapni pur Jesucrist.

¹⁵ Anre de didxldí ni iniia laat, nápac par chaldilaaz bnietsi dec Jesucrist beedny lo guichliu par gap de bniety perdón xte de xtulddeb, ne de

lo ira de bniety, nare naa mazru binduld. ¹⁶ Per masqui naa mazru binduld, Dios blaslaazny nare ne quit güexaclaaznéti Jesucrist naa te par gacbee de ni chaldilaaz xa ráp Jesucrist pacency par chaldilaaz bniety xtiidxny, ne ziy xquel gapdeb guelnabány par chazy nez lo Dios. ¹⁷ Pur ningui, iduibtiampte ná par idxapni didxdoony ne iniciacnì de diidx zaac par laany ni nány Rey ni quit chúuti dxi gaty, ne rápzacny guelrnabee par chazy pur ni laatisny nány Dios ax quit tu rianloti laany. Amén.

¹⁸ Timoteo, par nare liú noo zecac tuby llingaana pur ningui rniia liú baany zec ni gunii de profet pur liú desde gulo, ne zec tuby suldad ni re lo guerr quit idxibtiu nez lo de ni run contrí xtiidx Dios. ¹⁹ Guzutipné ni reldilaazu Jesucrist, ne baany púrzi de xgabzaac par gúnu zec ni riáld. Te pur nuu de bniety pur quit rundeb ziy, anre abnittecdeb ni reldilaazdeb xtiidx Dios. ²⁰ Ziy ná ni agudeed Himeneo cun Lijandri, pur ningui absáanadeb laznaa Satanás te par iseeddeb dec quit náti par iniideb mal diidx pur Dios.

2

¹ Ne anre nidoote ni rniia laat ná dec gulnaab lo Dios, gultiin gulnaab lony pur irate bniety guichliu, ne guldeedza gracyny. ² Ná par inaabni lo Dios pur de rey ne pur irate de ni nap guel-gurtisy lo guichliu par chalee ibánni naldiу ne chazaza chonuun xnez Dios zec ni riáld. ³ Te pur ziy ná ni rdxalaaz Xtadni Dios ni run perdón de xtuldnì, ⁴ laany ni rcaazzacny dec irate bniety gac perdón ne chúuza dxi ni gacbezaacdeb xi zelo de

didxldí xtenny. ⁵ Te pur tubyziny náñy Dios, ne pur tubyziza Jesucrist zelee idxapní nez par cun Dios pur ni beedny lo guichliu zecac tuby bniety guichliu. ⁶ Jesucrist gutyny lo cruzy par gudillyny pur xtuld irate bniety guichliu, ziý ná ni bliuu Dios bniety chi bdziny dxi ni bcuabeeny gac ziý. ⁷ Pur ningui bcuabeeny nare gaca apóstol par itícha xtiidxny, ne par iseeda de bniety ni quít ná bniety Israel cún ni ná didxldí, ne xa xquel chaldilaazdeb Jesucrist. (Guldípaca, gati dixúiztia.)

⁸ Anre rcaaza dec iranezte inaab de bniety nguiu lo Dios, per ná par chanédeb cuend dec dibylotisy ná par inaabdeb lo Dios sin duld, sin guelnadxiich ne sin didxguidx. ⁹ Ne ziýza rcaaza dec de gunaa sudeb zec ni riáld, zec ni ná par. Quit tedca suchuudeb cun de or, de perli, de vestid zaac, o guelcuenzipac raczaacza guichquiani. ¹⁰ Te pur mazru güen gúndeb de ni ná güen, zec ni riáld gún ira de gunaa ni azé xnez Dios. ¹¹ Ne de gunaa ná par icuadiagtisdeb sin quít xi initideb chi acaliuu de nguiu xtiidx Dios. ¹² Zec chi adxasaa zecli de nguiu ne zecliza de gunaa par icuadiagdeb xtiidx Dios, quít náti par iseед tuby gunaa laadeb te pur nguiu ná ni nap guelnabee par ziý, ax quít náti par tedlo de gunaa sino que ná par icuadiagtisdeb. ¹³ Te pur Dios nidoote banchuuny Adán, chiyru Ev. ¹⁴ Ne gati Adánti guc engany sino que Ev, ne pur enganyqui ax baanbi duld. ¹⁵ Per zectiziac de nguiu napza de gunaa perdón belati laadeb gúndeb xtsiindeb zec nan ni nádeb, chalaa chaldilaazdeb Dios, icaazdeb saa bnietdeb, ne ibányzadeb zacru.

3

¹ Gulchané cuend xtiidxa: belati nuu bniety ni run xgab gap guelrnabee lo irate de ni reldilaaz Jesucrist par iliuub laadeb xnez Dios, laab güenqui ná ni rcaazbi gúnbí. ² Per ni nap guelrnabeequi ná par gúnbí zec ni riáld par quit tu iniyá laab. Tubysi chialbi ná par chúu, ibánybi zacru ne ni nianlaaz par chalee gap de bniety didxdoo laab. Ziyza gacbi güen cun de ni rdziny rulizbi, ne náza par gacbi tuby bniety ni nán par iseedbí de bniety. ³ Quit náti par gacbi borrach, nicza biny didxguidx, nicza quit quílytib nez par icáab xmíly de bniety sino que ná par gacbi güen cun tutix ne nadolaazza sin quit sebylaaztib mily. ⁴ Ziyza ná par inabeeb lizbi zec ni riáld par iliuub de lliinbi xa gapdeby didxdoo ne icuadiagzadeby diidx. ⁵ (Te pur belati laab quit gánbi inabeeb lizbi ax, ¿xólesa inabeeb, o cuxnezzacbi de ni reldilaaz Jesucrist?) ⁶ Pur ningui, tuby ni teste güeldilaaz Jesucrist, quit náti par inabeeb lo de ni reldilaaz laany te quit gun izubyaab laab ax yáldbi saagac castigu ni biáld bindxab. ⁷ Ni ráp guelrnabeequi axt de ni quit reldilaaz Jesucrist ná par gumbee laab dec güenqui nabánybi par quit yanxtiub, o gúnza bindxab gan laab.

⁸ Anre ziytiziaczá de bniety nguiu ni acuabee par gacnédeb de ni rnabee, ná par gúndeb zec ni riáld par gap de bniety didxdoo laadeb, izuub-deb xtiidxdeb, quit gactideb borrach, nicza quit quílytideb nez par icáadeb xmíly bniety. ⁹ Dibyquia dibylaazdeb ná par sutipnédeb de didxldí ni abliuu Dios dunní ni aroldilaazní. ¹⁰ Pur ningui, nidoote ná par gacdeb prueb dún xa rundeb ne

belati quit xi xfaltideb, chiyru azelee izu bniety laadeb par gacnédeb de ni rnabee. ¹¹ Ziytiziacza de bniety gunaa ni acuabeeza par gacné, ná par gúndeb zec ni riáld, par gap de bniety didxdoo laadeb, quit iniyátideb bniety sino que ibánydeb zacru ne izuubdeb xtiidxdeb par irate. ¹² Chiy de bniety nguiu ni icabee par gacnédeb bniety ni rnabee lo de ni a ná xpíny Crist, tubyzi chialdeb ná par chúu ne inabeezadeb lizdeb ne de lliindeb zec ni riáld. ¹³ Te pur de ni run sirví zec ni riáld ax gati rápziti bniety didxdoo laadeb, sino que sin dxiby azelee iniideb xa xquel reldilaazdeb Jesucrist.

¹⁴ Nadios gueeld chalee guedguíaa liú. Per cacuáa cartré ¹⁵ te belati gaclaa ax anánnu xa xquel ná par ibány bniety nez lo iraru de xpíny Dios, laadeb ni anádeb xpíny Dios ni rbeznabány, ax rzutipnédeb ne rliuudeb de didxldí xtenny. ¹⁶ Dunní nanchuun dec quesentiand guroo nány, laany ni roldilaazniny:

Beedny lo guichliu zec tuby bniety guichliu,
gunii Spíritu Sant dec laany nania naniany
ne guná de ángli laany beedny lo guichliu.
Bríich xtiidxny iduibte lo guichliu,
iranezte güeldilaaz bniety laany
ax bieepny llayabaa.

4

¹ Spíritu Sant agudixteldíny dec zéedru dxi nuu bniety saandeb ni reldilaazdeb Jesucrist, amazru gúndeb cuend xtiidx de ni run engany ne irateru ni zéed pur bindxab. ² Laadeb amazru gúndeb cuend xtiidx de bindixú ni run engany de bniety, de ni aquitru xi rziienti run duld pur abiadeb rundeb

ziy. ³ De binqui sniideb dec quit nati par guchnaa bniety ne quitza iquiinti bniety iralo. Per Dios guluuny iralote aliment par iquiiny de bniety ni reldilaaz laany, de ni anan cun ni na didxldi ax sdeeddeb gracyny. ⁴ Te pur irate ni baany Dios na gun, ax quit xi nati par icuanaan belati ideedni gracyny chi aiquiinni. ⁵ Te pur chi rnaabni lo Dios laany cun xtiidxny runldeeny quia ni iquiinni.

⁶ Pur ningui, belati liu iseedu de ni reldilaaz Jesucrist zec ni aguniia liu, ax cayuncu sirvi lo Jesucrist zec ni riald, pur ziy zeza iseedru ni anannu xte guelreldilaazqui ne de didxzaac ni zenuu. ⁷ Per quit guntiu cuend de ni rguichlaaz de biny, de ni quit nati didxldi pur Dios, gunru guelaa bseed sutipu ibaniu zec ni rcaaz Dios. ⁸ Guenqui na gun bniety iralote muimiant par illung bniety, per de lo irate cos mazrupac sac ibany bniety zec ni rcaaz Dios. Te pur gati lo guichliuztire illiu ni ibany bniety zec ni rcaaz Dios, sino que nezallayabaa rut gap bniety guelnabany par chazy. ⁹ Dunn nanni dec didxldi na de diidxqui, ax na par chaldilaaz irate bniety. ¹⁰ Pur ningui masqui zectispac ni cadeedni, per zela cadxanni ni cadxanni pur ni roldilaazni Dios ni rbeznabany, laany ni rbezny par gacneny irate bniety, per mastecru par cun de ni reldilaaz laany.

¹¹ Ziy na par iseedu de bniety par gundeb ziy. ¹² Bcualo quit inii bniety dec quit illiuti pur ni gady gactiu bingul. Guenru baany pur gacu tuby ejempli par de ni reldilaaz Jesucrist zecli xquel ni rguii diidx, xquel ni nabaniu, xquel ni rcaazu stuby de bniety, xquel ni reldilaazu Dios ne zecliza

pur de xgabzaac. ¹³ Lalzi guelda, güelaaru biildy xtiidx Dios nez lo de bniety, blidxdeb ne bliuudeb xi zelo xtiidx Dios. ¹⁴ Quit yianlaazu gúnu zec ni riáld pur guelnán ni bniidx Dios liú chi bzubnaa de bingul quiu chi gucbeedeb dec liú ná ni abcuahee Dios.

¹⁵ Güené cuend de diidxqui te par gacbee irate bniety dec liú zeza ziúu par delant. ¹⁶ Bcualo liú ne ni rseedu stuby de bniety. Güelaa guzutipná ni nánnu, te pur ziy xquel zeclí cayacníu liú ne cayacnézacu de ni rcuadiag xtiidxu.

5

¹ Quit tildnétiu tuby bingul sino que zacru xquel blidxbi guninéb zecac xtradu, ne de ni ná bniinru que liú, blidxdeb zecac tuby betsu. ² Ziyza blidx de nanbingul zecac tuby xnanu, ne de ni ná bniinru que liú, blidxdeb zecac tuby bzaanu, dibylotisy xquel guninédeb.

³ Baany cuend de gunaa viud ni aquitiru xfamilni, de ni aquítru xi napti lo guichliuré.

⁴ Per belati tuby viud nuu de lliinbi o de llagbi, ax laadebiy nidoote ná par iseenddeb gúndeb cuend de xfamildeb, gacnédeb laadeb par quillydeb ni btiio xtraddeb xnandeb laadeb. Te pur ziy ná güen, ne ziyza ná ni rdxalaaz Dios. ⁵ Bniety gunaa ni guldípac a ná viud, ni aquítru tu napti lo guichliuré, Diostisy ná ni azenzelaazbi gacné laab ax quit rbezti rguiin rnaabbí lony rdxi ne guxin. ⁶ Per tuby viud ni nabány zec ni ná xgabni, laab náb zecac tuby binguty pur ni quit zenelaaztib Dios. ⁷ Gudixtee irate de diidxqui lo de ni areldilaaz Jesucrist te par quit chúu nez

iniyá bniety laadeb. ⁸ Te pur elqui ni quit racné de saani, ne belati niclí de xfamilbi ni rbez lizbi quit racnéb, laab absaanbi ni reldilaazbi ne mazrulza náb que de ni quit reldilaaz Jesucrist.

⁹ Quit icáatiu lá tutix de gunaa viud par gacnét sino que púrzi viud ni anuu más de sesent iz ne ni guu tubyzi chialni. ¹⁰ Ne ziyza bel rumbee bniety laab dec púrzi ni illiú abaanbi, bel btiiob de lliinbi zec ni riáld, bel bdedlaab lizbi bijan de ni rdziny rulizbi, bel quesentiand zaac gucbi cun de ni reldilaaz Jesucrist chi rdzindeb lizbi, bel gucnéb de ni cadeed guelzii, ne bel baanbi pur baanbi púrzi ni ná güen.

¹¹ Per quit icáatiu lá de gunaa viud ni gady gacbingul, te pur chi galde rcaazdeb guchnaadeb ax quit runtideb ni ná par gúndeb pur Crist pur ni rcaazdeb guchnaadeb stuby. ¹² Parzi ax rundeb duld pur ni quit rundeb zec ni abaandeb compromis par cun Crist. ¹³ Ne ziyza de ni gady gacbingulqui chigald tuby, tuby ruliz bniety azédeb ax riia lodeb quit xi rundeb. Ne gati zíyziti, sino que acayueedeb xtiidx biny, riutédeb lo xitixpac ax rniideb ni quit ná par iniideb. ¹⁴ Pur ningui, nare rcaaza dec de gunaa viud ni ná bniinru, güenru su guchnaadeb stuby, gacdeb de family ne inabeeedeb lizdeb zec ni riáld, te par quit chúu nez iniyá de ni rdxichné dunní. ¹⁵ Te pur nuu de viud ni absaan xnez Dios ax azédeb xnez bñidxab.

¹⁶ Ne belati tuby bniety ni reldilaaz Jesucrist rac xfamilbi tuby bniety gunaa ni abiian viud, ax laab ná par gacnél laab te par quit cuenzi xaat de carguqui quia de sanioldilaazni Jesucrist. Ax ziy

xquel chalee gacnédeb de viud ni guldípac aquitru tu napti lo guichliuré.

¹⁷ De ni reldilaaz xtiidx Jesucrist ná par gapdeb didxdoo de ni rnabee laadeb ne de ni rnii ne rliuza xtiidx Dios zec ni riáld, ná par ideedzadeb laadeb irate ni rquiindeb. ¹⁸ Te pur lo xquiits Dios rnii: “Quit yianlaazu ideedu ni go de ladxaa lalzi cayundem xtsiinii”, ne ziyza rnii lo xquiits Dios: “Ná par gall bniety ni run dziiiny.”

¹⁹ Quit góntiu cuend ni icuaquiadeb tuby bniety ni rnabee belati quity tiop o chon bniety ni inii dec didxldí ná ni caniideb pur laab. ²⁰ Per belati tuby de ni anap guelrnabee zélaa cayunbi duld, ná par ilidxub nez lo iradeb te idxiby los demásdeb.

²¹ Anre pur Dios, pur Jesucrist ne pur de ángli ni bcuabeeny, nare rniiia liú güené cuend ne baany zec ni aguniia liú sin quit cuétiu lo bniety, baany tubylo cun iradeb. ²² Quit cuenzi yiublaaztiu par icuabiiu tuby bniety ni inabee te quit góntiu la quitqui xi mal runbi, ax gún bniety xgab dec né liú rdxalaazu zec ni runbi. Bcualo cun iralozy de duld.

²³ Ne ziyza pur ni duibzi rac láaniu, pur ni quit nadaanti láaniu, quit guéetiu nis nallzi, güenru bguchni duudx vin.

²⁴ Nuu de ni ríentegac xi duld cayundeb anste ni ideeddeb cuend Dios, per nuudeb nicli quit ríenti xi duld cayundeb axtisy chi ideeddeb cuendny. ²⁵ Ziytiziacza nuu de ni ríentegac xi de güen cayundeb, ne nuuzadeb nicli quit ríenti de güen ni cayundeb, per teru gabee bnietsni.

6

¹ De bniety ni nuu de mos rquiinpac gapdeb didxdoo xlámdeb te par quit tu inii de mal diidx contrí Dios o contrí de xtiidxny ni caliuun laat. ² Ne belati zec ni reldilaazdeb Jesucrist ziyya reldilaazza xlámdebny, ax mastecru ná par gapdeb didxdoo laadeb pur ni tubylote reldilaazdebny. Ne náza par gúndeb xtsiindeb zec ni riáld pur ni cayundeb sirvi lo tuby sanireldilaazdeb Jesucrist. Ziyy bseed de bniety, ne gutsdeb gúndeb ziyy.

³ Belati nuu tuby bniety ni rliuu de diidx ni quit ná saa de didxzaac xte Xtadnì Jesucrist ne belati nicli zec ni roldilaaznì Jesucrist quit rliuub de bniety, ⁴ laab naizbi tuby binyachy ni quit xi gánti. Pur ni rdxalaazbi rchaab lo diidx ne nicli gati xnezni rueeb, parzi ax ruygui zéed de guelracnalaaz, guelrdxichnesaa, guelr-guelosaa ax aquitiru confianz cun saadeb. ⁵ De ni ná ziyy quit rdeedti rdilddeb tant iralozy de ni quit illiú ni anuu láani quiadeb pur ni quit gández ni ná didxldí, ax rliodeb dec pur chaldilaazdeb Jesucrist quesentiand ricu gacdeb. De ni ná ziyy, gubicá lodeb. ⁶ Quesentiandqui ricurooy a ná bniety chi areldilaaz Jesucrist, per bniety ni ná cunformi cun ni naptisbi. ⁷ Te pur xíteete quit biopnétin lo guichliuré ne xíteeteza quit xi chaleeti chonén chi gatyni. ⁸ Bel nuu ni iquiinni ne ni idacuni cun ziyy ná par idxaanni cunformi. ⁹ Per de ni rzebylaaz gac ricu lo guichliuré quit releeti sutipdeb, runac bindxab gan laadeb. Rundeb de xgab ni quit illiú ax rundeb ni quit ná par gúndeb ni run rnitdeb laadeb. ¹⁰ Te pur guelrzebylaaz

míly niy ná labaa xte irate de mal. Ne nuudeb pur guelrzebylaazqui, absaandeb ni reldilaazdeb Dios ax lagac laadeb cateeddeb laadeb guelzii.

¹¹ Per liú, Timoteo xpyny Dios, gubicá lo de malqui. Baany pur ibániu zacru zec ni rcaaz Dios ibániu, güeldilaazny, guc nadolaaaz, gúp pacency ne bcaaaz de saa bnietiu. ¹² Baanpac pur guztipné ni reldilaazu xtiidx Jesucrist. Quít initiu guelnabány ni ná guelnabány par chazy, te pur par ziy abcuaabeeny liú ax guniui xa xquel reldilaazu Jesucrist nez lo ziény de bniety. ¹³ Anre, pur Dios ni rguaad guelnabány irate de ni nuu lo guichliu, ne pur Jesucrist ni gunii sin dxiby ni ná didxldí nez lo Poncio Pilat, nare rnabiia liú ¹⁴ icuadiagu diidx gúnu ni rniiia liú, sin quít ichutiuni te par quít inii bniety dec quít cayuntiu xnezni. Baany ziy axtqui dxi ni gueed Xtadnì Jesucrist stuby. ¹⁵ Laany zeedny dxi ni inabee Dios gueedny, Dios ni riáld didxdoo ne diidx zaac, laatisny ni nány Dios ne rápny irate guelnabee, laany ni nány Rey lo de rey ne Dad lo de dad. ¹⁶ Laany ni quít chúuti dxi gatyny, laany ni rbezny rut mazru nanieeny rut quít tu chaleeti ibii. Nic tuby bniety guichliu gady iniáti laany ne quítza xo iniátidebny. ¡Par laany ná didxdoo ne guelnabee par chazy! Amén.

¹⁷ De bniety ni ná ricu lo guichliu anre, gutsdeb quít gunnarootideb nicliza quít channelaaztideb dec ni rápdeb a ná par chazy, te pur de guelnazaac ni ráp bniety ruu chi rrany. Güenru channelaazdeb Dios ni rbeznabány te pur laany ná ni rguaadny dunní irate cos zecpaczaxnarul par saclazni. ¹⁸ Gutsdeb gúndeb ni ná güen, gúndeb zienzi de

ni illiú ne saclaaazdeb gacnédeb de bniety ni runlieedxni. ¹⁹ Te ziy xquel acachasaadeb de guelnazaac ni sutipné laadeb zéedru dxi par yálddeb guelnabány par chazy llayabaa.

²⁰ Timoteo, güené cuend ni ná par gúnu. Quit güntiu cuend de diidx ni quit illiú ni nuu lo guichliuré nicliza de dixú, nicza de ni ruee de ni rlilo dec quesentiand nán ne niclì gati didxldí ná ni nández. ²¹ Te pur nuu de ni run ziy anre, ax absaandeb ni reldilaazdeb Dios.

Dios gunldeeny quiu, Timoteo. Amén.

**Xtiidx Dios cun ditsa
New Testament in Zapotec, San Juan Guelavía
(MX:zab:Zapotec, San Juan Guelavía)**

copyright © 1995 Wycliffe Bible Translators, Inc.

Language: Zapotec, San Juan Guelavía

Translation by: Wycliffe Bible Translators, Inc.

Zapotec, San Juan Guelavía

zab

Mexico

Copyright Information

© 1995, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, San Juan Guelavía

© 1995, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

4b6898c2-1ae7-5b64-b781-1a33bd63388f